

Ni Presidente
Thomas S. Monson



Ti Pagrebbengantayo nga Umarayat

Para kadagiti Santo iti Ud-udina nga Aldaw, ti panagkasapulan a mangarayat kadagiti kakabsat a lallaki ken babbai a, gapu iti maysa a rason wenno sabali, saanen a makimismisa wenno mapmapan iti Simbaan ket addaan iti agnanayon a kinapategna daytoy. Am-ammotayo kadi dagiti kasdiay a tattao a naminsan idin a naan-anay nga immawat ken nagbiag iti ebanghelio? No kasta, ania ti pagrebbengantayo nga umarayat kadakuada?

Ibilangyo dagiti napukaw kadagiti lallakay ken babaket, dagiti balo, ken dagiti masaksakit. Masansan unay a masarakanda iti namaga ken naliday a let-ang ti panakaisina a maawagan iti panagmaymaysa. No sumina ti kinaagtutubo, no dumteng ti panagsakit, no kumapuy ti regta, no kumudrep ti silaw ti namnama, mabalin ida a masaranay ken matulongan ti ima a tumultulong ken ti puso a manangngaasi.

Agpayso nga adda dagiti dadduma nga agkasapulan iti pannakaarayat. Adda dagiti agkarkarigatan a mangrimbaw iti basol idinto ta adda dagiti agallaalla iti buteng wenno kinaawan ganaygay wenno kinaawan ammo. Ania man ti gapu, insinada ti bagbagida iti panagaktibo iti Simbaan. Ken awan duadua nga agtalinaeddanto a napukaw malaksid no adda mangriing kadatayo—nga aktibo a miembro ti Simbaan—a tarigagay a mangarayat ken mangisalakan.

Maysa a Mangipakita iti Dalan

Sumagmamano a panawen ti napalabas nakaaawatak iti surat ti maysa a lalaki a kimmalilis manipud iti Simbaan. Daytoy ti mangibagi iti kaaduan a miembrotayo. Kalpasan ti panangiladawanna no kasano a nagbalin a saan nga aktibo isuna, insuratna:

“Adu’t kukuak idi ket itan bassit unayen. Diak naragsak ket mariknak a kasla mapapaayak iti amin a banag. Kanayon nga adda pammaneknekk maipanggep iti ebanghelio nupay diak naan-anay nga agbibbiag kadagiti pannursurona. Dawatek dagiti kararagyo.

“Saanyo koma a liplipatan dagiti kaduatayo nga awan ditoy—dagiti napukaw a Santo iti Ud-udina nga Aldaw. Ammok no sadino ti Simbaan, ngem no dadduma panagkunak a kasapulak ti maysa a tao a mangipakita kaniak iti dalan, mangparegta kaniak, mangikkat iti butengko, ken mangiburay iti pammaneknek kaniak.”

Bayat ti panangbasak iti daytoy a surat, nalagipko ti panagpasiarko idi iti maysa kadagiti dadakkel a galeria ti arte ti lubong—ti nalatak a Victoria ken Albert Museum iti London, England. Sadiay, adda napintas ti pannakaikuadrone nga obra maestra nga impinta idi 1831ni Joseph Mallord William Turner. Itampok ti naipinta a ladawan ti napuskol a nangingisit nga ulep ken ti rungsot ti nadawel a baybay a mangipakita nga adda agur-uray a pagpeggadan ken pannakatay.

Nagraniag ti maysa a silaw manipud iti naisadsad a bangka iti adayo. Iti sanguanan, adda dakkel a lifeboat, nga impallangatok dagiti umay a dalluyon ti nalabutab a danum. Sipipigsa a naggaod dagiti lallaki bayat ti panangsarunson ti lifeboat iti bagyo. Iti igid ti baybay nakatakder ti asawa a babai ken dua nga annak, a nabasa iti tudo ken sinaplit ti angin. Sigagagar a matmatmatanda ti baybay. Iti panunotko inyababak ti nagan ti naipinta a ladawan. Para kaniak nagbalin daytoy a *Panangarayay*.¹

Iti baet dagiti pakarikutan ti biag, adda peggad nga agur-uray. Dagiti lallaki ken babbai, ubbing man wenno nataengan ket masarakanda ti bagbagida a naisadsad ken naipasango iti pakadadaelan. Asinonto ti mangiturong kadagiti lifeboat, a mangpanaw kadagiti gin-awa ti pagtaengan ken familia, ket mapan umarayat?

Saan nga imposible ti aramiddayo. Addatayo iti panangibaon ti Apo; maikaritayo iti tulongna.

Bayat ti panagministro ti Maestro, kiniddawna kadagiti agdakdaklis iti Galilea a panawanda dagiti iketda ket sumurotda Kenkuana nga imbagana, “Pagbalinenkayto a dumakdaklis kadagiti tao.”² Makikaduatayo koma kadagiti ragup dagiti dumakdaklis a lallaki ken babbai, tapno makaipaaytayo iti ania man a tulong a kabaelantayo.

Pagrebngantayo ti tumulong a mangispal wenno mangarayat kadagiti nangpanawen iti kinatalged ti panagaktibo, tapno iti kasta mayegda iti lamisaan ti Apo tapno agpennek iti balikasna, tapno magun-od ti panangkadkadua ti Espirituna, ken tapno agbalin a “saantayon a ganggannaet ken dumagdagus, no di ket kailiandatayon dagiti sasanto, ken kabbalay ti Dios.”³

Ti Pagbatayan ti Ayat

Natakuatak ti dua kangrunaan a gapu iti panagsubli iti panagaktibo ken panagbalbaliw kadagiti ugali, kadawyan, ken tignay. Umuna, agsubli dagiti indibidual gapu ta impakita ti maysa a tao kadakuada dagiti agnayanon a posibilidadda ken tinulonganna ida a mangikeddeng a mangtun-oy kadagitoy. Dagiti saan unay nga aktibo ket saan a makontento iti nabayag a panawen apaman a makitada a magaw-atan ti paglaingan.

Maikadua, agsubli dagiti dadduma gapu ta dagiti ipatpategda wenno “kailian dagiti sasanto” ket sinurotdan ti balakad ti Mangisalikan, inayatdan dagiti padada

a tao kas iti bagida,⁴ ken tinulonganda dagiti dadduma tapno matungpal dagiti arapaapda ken maragpat dagiti ambisionda.

Ti pangguyugoy iti daytoy a proseso ket—ken agtul-tuloyto—ti pagbatayan ti ayat.

Iti pudno unay a kaipapanan, dagiti tao a naisadsad iti nadalluyon a baybay iti naipinta a ladawan ni Turner ket maipada kadagiti saan unay nga aktibo a miembro nga agur-uray nga arayateng dagitay tumultulong kadagiti agkagkagumaan. Aggagar dagiti puspusoda iti tulong. Ikararagan dagiti inna ken amma dagiti annakda a lallaki ken babbai. Ikararag dagiti assawa a babbai a matulongan koma dagiti assawada. No dadduma ikararagan dagiti ubbing dagiti nagannak kadakuada.

Ikararagko ta sapay koma a maaddaantayo iti tari-gagay a mangarayat kadagiti saan unay nga aktibo ken maisublitayo ida iti rag-o ti ebanghelio ni Jesucristo, tapno makiranudda kadayo iti daya amin nga ited ti naan-anay a pannakisinninged.

Makatumongtayo koma nga umarayat wenno mangispal kadagiti napukaw nga adda iti lawlawtayo: dagiti babbaket ken lallakay, dagiti balo, dagiti masaksakit, dagiti adda pagkuranganna, dagiti saan nga aktibo, ken dagiti saan nga agtungtungpal kadagiti bilin. Mayawattayo koma kadakuada ti ima a mangtulong ken ti puso a manangngaasi. Iti panangaramiddayo iti kastoy, mangisangbaytayonto iti rag-o iti puspusoda, ket mapadasantayonto ti dakkel a pannakapnek nga umay kadayo no agtitinnulongtayo iti dalan nga agturong iti agnanayon a biag.

DAGITI NAGADAWAN

1. Ti naan-anay a paulo ti naipinta a ladawan ket ti *Life-Boat and Manby Apparatus Going Off to a Stranded Vessel Making Signal (Blue Lights) of Distress*.
2. Mateo 4:19.
3. Taga Efeso 2:19.
4. Kitaen iti Mateo 22:39.

PANANGISURO MANIPUD ITI DAYTOY A MENSAHE

Ibilang ti panangsaludsodyo kadagiti tao a sarungkaranyo no adda am-ammoda nga aggagar a makimisa. Mabalinyo ti pumili iti maysa a tao ket paglilinnawaganyo dagiti wagas a pangipakitaan iti ayat, kas iti panangawis kenkuana a makiraman iti family home evening wenno umay makipangmalem.

AGTUTUBO

Ti Sagut ni Jen

Ni Josi S. Kilpack

Nakaaramidak iti adu a biddut a pili idi addaak iti maikadua a tawen ti haiskul. Dagidiay a pili ti nangiturong iti narikut a nagbanagan ken kinaliday, ket inkeddengko nga usaren ti bakasionko iti kalgaw tapno mangrugiak nga agaramid kadagiti panagbalbaliw. Idi nangrugi manen ti panageskuela, nanganak iti pangngaldaw iti tugaw ti maysa a pagdigusan wenno iti saan a mapagpagnaan a hallway tapno maliklikak ti madi a pannakilangen nga agur-uray kaniak iti panagsublik.

Diak kaano man narikna idi nga agmaymaysaak.

Kalpasanna inikkannak ti Dios iti maysa a sagut: Imbaonna kaniak ni Jen. Dinak pulos hinusgaan ni Jen kadagiti biddutko ngem ketdi pinaregtanak nga agaramid kadagiti banag nga ammok a rumbeng. Iti panangammok nga adda ni Jen iti eskuela a nangtulong kaniak a mangituloy nga agbasa kadagiti nasantuan a kasuratan ken mangpatibker iti pammaneknekko. Idi dumteng ti panawen ti panagturpos, napaneknekak iti bagik a nagkumitak nga agbalbaliw.

No dadduma pampanunotek nga ania ngata koma ti nagbalinak no dinak tinulongan ni Jen. Nakapagbiagak ngata koma a mayannurot kadagiti prinsipiok no awan isuna? Naggasat ta diakto kaano man maammuan gapu ta adda isuna idi sadiay a sipupuso, a sidadaan ken sita-tallugod a tumulong kaniak.

Agnaed ti nagsurat iti Utah, USA.

ANNAK

Dagiti Wagas a Mangarayay

Isuro ni Presidente Thomas S. Monson a nasken a tulongantayo dagiti dadduma, agraman dagiti babbaket ken lallakay, dagiti balo, dagiti masaksakit, dagiti saan nga aktibo, ken dagiti agkasapulan iti nayon pay a tulong. Mangpanunot kadagiti tao nga am-ammoyo a mabalin a mangusar iti sumagmamano a serbisio.

Mangisurat wenno mangidrowing iti sumagmamano a ladawan ti ideya para kadagiti wagas a pakatulonganyo iti sumagmamano kadagitoy a tattao. Mabalinyo a kiddawen kadagiti nagannak kadakayo a mangtulong kadakayo a mangpanunot kadagiti ideya ket kalpasanna mangpili iti maysa a padasen itoy a lawas.



Pammati, Pamilia, Tulong

Ti Nadiosan a Mision ni Jesucristo: Namarsua

Sikakararag nga adalenyoy daytoy a material ken, no maitutop, ilawlawagyo daytoy kadagiti kakabsat a babbai a sarungkaranyo. Usarenyoy dagiti saludsod a mangtulog kadakayo a mangpapigsa kadagiti kakabsatyo a babbai ken mangaramid iti Relief Society nga aktibo a paset ti bukodyo a biag. Para iti mainayon nga impormasion mapan iti reliefsociety.lds.org.

Daytoy ti umuna iti maysa a serye dagiti Mensahe iti Visiting Teaching a mangitampok kadagiti aspekto ti mision ti Mangisalahan.

Ni Jesucristo “pinarsua[na] dagiti langit ken ti daga” (3 Nephi 9:15). Inaramidna dagitoy babaen ti bileg ti priesthood, babaen ti panangiturong ti Nailangitan nga Amatayo (kitaen iti Moises 1:33).

“Anian a panagyamantayo koma ta pinarsua ti masirib a Namarsua ti daga ket inkabilnatayo ditoy,” kinuna ni Presidente Thomas S. Monson, “. . . tapno mapadasantayo ti panawen ti pannakasubok, maysa a gundaway a pakasubokan ti bagbagitayo tapno maikari iti amin nga insaganan ti Dios nga awatentayo.”¹ No usarentayo ti kinawayatayo nga agpili nga agtungpal kadagiti bilin ti Dios ken agbabawi, agbalintayo a maikari nga agsubli a makipagtaeng Kenkuana.

Maipapan iti Panagparsua, ni Presidente Dieter F. Uchtdorf, Maikadua a Mammagbaga iti Umuna a Panguluen, kinunana:

“Datayo ti gapu ti nangparsua-anna iti lubong! . . .

“Daytoy ti paradox ti tao: no maidilig iti Dios, awan ti pateg ti tao; ngem datayo ti kapatgan iti Dios.”² Iti panangammo a pinarsua ni Jesucristo ti daga para kadayoy

gapu ta kaipapananna kadayoy nga amin a banag iti Nailangitan nga Ama ket makatulog kadayoy a mangpadakkel iti ayattayo para Kadakuada.

Manipud kadagiti Nasantuan a Kasuratan

Juan 1:3; Hebreo 1:1–2; Mosiah 3:8; Moises 1:30–33, 35–39; Abraham 3:24–25

Manipud iti Pakasaritaantayo

Naparsuatayo iti ladawan ti Dios (kitaen iti Moises 2:26–27), ken addaantayo iti nadiosan a potensial wenno mabalin a pagbalinan. Binalakadan ni Propeta Joseph Smith dagiti kakabsat iti Relief Society nga “agbiagda a nasayaat a mayannurot iti karbengan[da].”³ Babaen dayta a pammaregta kas maysa a pundasion, nasuruanen dagiti kakabsat a babbai iti Simbaan ni Jesucristo dagiti Santo iti Ud-udina nga Aldaw nga agbiagda a nasayaat a mayannurot iti nadiosan a potensialda babaen ti panangipatungpalda kadagiti panggep ti Dios para kadakuada. “Bayat ti pannakaawatda no asinoda a talaga—annak a babbai ti Dios, nga addaan iti kadawyan a kabaelan a mangipateg ken mangtaraon—maragpatda ti potensialda kas nasantuan a babbai.”⁴

“Naikabilkayo itan iti kasasaad a mabalinyo ti agtignay a mayannurot kadagiti panangngaasi nga immula ti Dios kadagiti barukongyo,” kinuna ni Propeta Joseph Smith. “No agbiagkayo a mayannurot kadagitoy a pagbatayan anian a nagindaklan ken nagdayag!—no agbiagkayo a nasayaat a mayannurot kadagiti karbenganyo, saan a mapengdan dagiti anghel iti panangkadkaduada kadakayo.”⁵

DAGITI NAGADAWAN

1. Thomas S. Monson, “The Race of Life,” *Liahona*, Mayo 2012, 91.
2. Dieter F. Uchtdorf, “You Matter to Him,” *Liahona*, Nob. 2011, 20.
3. Joseph Fielding Smith, iti *Daughters in My Kingdom: The History and Work of Relief Society* (2011), 171.
4. *Daughters in My Kingdom*, 171.
5. Joseph Smith, iti *Daughters in My Kingdom*, 169.

Ania ti Maaramidko?

1. Kasano a mangpadakkel iti ayattayo para iti Mangisalahan ti pannakaawattayo iti nadiosan a kababalintayo?
2. Kasano a maipakitayo ti panagyamantayo kadagiti pinarsua ti Dios?

© 2013 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/13. Pannakaanamongna a maipatarus: 6/13. Pannaakaipatarus ti *Visiting Teaching Message, October 2013*. Ilokano. 10670 864